

# SCHNAPPLÜFTLI


E Infobleddli fir unseri Gönner

Uusgoob 2/06



• Faasnacht  
2006

• Bilder  
Yyschällete

Samschtig, 19.8.06:  
Pick-Nick mit de Gönner.  
Lueg Syte 13! 

YYSNACHT

**Mit dr zem erschte Mool  
duuregfierte «Yschällette» in  
unserem ney umbaute Käller,  
hänn mir die e bitz spezielli  
Faasnacht'06 sicherlig würdig  
yyggschällt ... s isch Supi gsi:**

Vorewägg mecht ych kurz erklääre, worum denn die Faasnacht'06 esoo speziell gsi isch. Wo mir nämmlig am Samschtig-Zoobe vor em Morgestrauch eppe am 22h00 uss em Käller uffte koo sinn, het s gschneyt. Guet ... das isch jo aigendlig nid unbedingt speziell und het s in dr Vergangehait au scho oft gää. Dasmool bsunders isch aifach d Mängi vo däm Schnee gsi. Unseri letschdte Höggler sinn unter zem Dayl fascht scho Abentüürlige Bedingige denn irgendwann doch au no Haime koo. Es sinn weeder Dram no Büss gfaare, d Taxi-Wartezytte hänn geege 3 Stunde bedrayt und die ainzige Meegligkaite sinn äntwäder laufe oder Autostopp gsi. S wirgglige Ussmass het me denn aber erscht am Sunntig-Morge gsee ... Basel isch byme halbe Meter Pulver förmilig im Schnee versoffe. Sogar unsere Schefflogistiger, dr Mull, isch fir emool an syni Gränze gschtosse und s isch au fir iin e woori Herussforderig gsi. Wo n ych 12 Stund vor em Morgestrauch in de Muunbuuts durchs Gündülü gstampft bi, han ych mir eerlig gsayt nid kenne vorstelle, dass das e normaali Faasnacht könn gää. Aber ... welch Wunder ... die viile Orangsche Männli, wo am Donnschtig-Morge ammel so närve, hänn sensazio-nelli Arbed glayschted. Hunderti vo Maaschtunde (villicht het s jo au Fraue drbyy kaa?), duusigi Schuuffe, Bagger, Laschtwääge und und und ... ungläublig, aber dr Cortège isch praggdisch völlig schneefrey gsi, hänzlige Danggl

Nomool zrugger zer «Yschällette», wo ja aigendlig e Art Leerabschlusspriefig fir unsere neye Källerscheff, dr Mull, gsi isch. Me ka s vorewägg nää, äär hett die Priefig mit Bruuwer beschdante ... s isch sauglatt gsi. Im Biisyy vo viile Gönner und Fründe, eme bekannte Schnitzelbangg (die Groobschlächtige) und de maischte Aggtive, isch me bi Määlsuppe und Waie so richtig gluschtig worde uff d Faasnacht. Dää scheeni Aaloss het sich sicherlig jetzt scho bewäärt und wird au im näggschte Joor (Frittig oder Samschtig) wider stattfinde.

Dr finanzielli Gwünn isch bi unserer Prömiere sicherlig nid im Vordergrund gstande, obwool d Faasnacht jo «schyyns» schuurig rentiert. Das beleggt die sicherlig seer interessant Erheebig, wo d Fachhochschul Beider Basel (FHBB) im Uffdraag vom Comité, duuregfiert het. Erlaubed mir, e baar Zaale uss dääre Arbed doo z erläüttere: D Faasnacht bringt de lokaale Untermääme rund 28 Millioone Frangge. So viil Gäld gänn die Aggtive und gschetzte 200'000 Zuegugger fir Goschdym, Wurfmateriaal, Verkeersmittel, Faasnachtsveranschaltige, Unterkumft und s liiblige Wool eppe uss. In d Däsche gryffe muess drbyy aber au die öffentliggi Hand. Dr Staat gitt fir d Faasnacht rund 1 Millioon uss. Es wärde eppe 500'000 Eereamtligi Arbedsschtunde, drvoe ellay eppe 106'000 fir Kinder und Jugendligi, glayschted. Im Durchschnitt «verbrooted» jeede Aggtive zirka 137 Schtunde pro Joor fir dää kulturelli Aaloos. Grossi Zaale fir eppis, wo Dayl vo dr Basler Idäntiteet isch und s ganz Joor viili Turisichte aaziet. Dr «genau» Wärt losst sich so also gar nid beziffere.

Marco

Wie unsere Obmaa, dr Marco, im Vorwort scho erwäänt het, hämmer uns uf e schneeryychi Faasnacht yygstellt. Sicher, Schnee hets an viiele Orte no khaa, aber d Route isch total gruunt gsii. Das Dangg de unzäälige Hälfer wo d Stadt ufbote het, isch denn aber alles super fyr die drey scheenschte Dääg vorbereitet gsii. Merci!



E Mutzeli an alli Hälfer, wo die unmänge vo Schnee us dr Innstadt gruunt hän!!

S Sujet het ghaiss: „Kai Schnigg-Schnagg, aifach und guet, aber coni Pracht, esoo mache mir fir emoll easy Faasnacht! D Goschdym het me meerheitlich sälber gnait. Au d Larve isch sälber gmoolt und mit Perügge und andere Details individuell ergänzt worde. Das isch bi de Luft-schnapperli e Novum gsii!





Schlicht, aifach und guet: s Requisit isches uf jedefall gsii. S Goschdym und Laarve hänn zwar au eso ussgsee, hänn uns allerdings e huffe Zyt in Aige-Feschii koschetet!





Am Zyschtig isch wie immer Kinderfaasnacht aagsait gsii. Mit ere Hampfle Gönner, Fründe, Familie und e paar Kids simmer durch s organisierte Kaos vo dr Innestadt gloffe.



Au das Joor, hänn uns d Heumattruech und dr René Bieri im Vordraab versteerkt. Im Spiil hets zuesätzlig Plusus gää dank dr Babsi und dr Selina.





Am Zyschtig Zoobe hämmer  
zämme im Kutti si „Buebetaum“  
in d Wirgiggkeit umgesetzt und  
sinn mit dr Münscherfääri ins  
Glaibasel ybere und das plyffend  
nota bene.





d Luftschnepper!



Faasnacht 2006

Immer mee Uffwand und dyyrer ... mir finde's zem lache,  
und wänn fir emool ganz eASY Faasnacht mache.

Was ka me andere, bi all dem Drugg doo nitzt das nyf,  
drumm schängge mir uns fir emool ganz eASY aifach Zytt.

Mir wänn ja d Faasnacht nid andere und scho gar nid verpfanze,  
aber bruuchts denn immer e toller & schöner Goschdyym am Ranze?

Mir wänn nämlich nid unbedingt uss Samet und Syyde griesse,  
wigglig wichtig isch uns aifach ganz eASY d Faasnacht z griesse.

(Dr Yysatz isch weeniger, fascht scho beschaide ... denn wärs ja e Hoon,  
bekännte mir das nid z späure, bi dr Vergaigig vo dr Subwesziion??)

S muess nid immer Eedel syy, fir emool duet's ou e normale Fumfel,  
drfür das Joor, ganz eASY mit em Drämmli uf e Bummel?

Trotz aifachem Stoff & Schueschachtle dien mir uns nid scheniere,  
dien s yygsparte Geld grad wider bimene «arme» Boizer inweschiere.

Die Entwiggig isch zuenämend, anne Besserig glaube mir bald nimm,  
und finde die Ussicht, nid nur on dr Faasnacht, wigglig ganz schlimm.

Voll und ganz dischtanziere mir uns vo all dääne blöffige Sache, und  
wänn wie scho gsoyt, ganz ganz eASY Faasnacht mache!!

Oobe links.  
Am Zyschtig bim  
Apéro im  
Baggestoos.  
„Gälli du kennsch  
mi nit!?“

Oobe rächts:  
Zwai  
Heumatruesche  
in Faasnachts-  
Hochform;  
dr Rolf und  
dr Ruedi bim  
Hotel Basel.

Dr Zeedel 2006.  
Gschriibe, aimol  
mee vom  
Obmaa  
perseenlig.  
D Farb fir  
d Uusgoob 2006  
het me Easy-  
Orange gwäält.

Wie scho erwäänt, het d Vorbereitig uf d Faasnacht in Bezuug uf Larve und Goschdym uns das Joor ainiges mee an Zyt koschtet. Normalerwyys lömmer das jo vo Fachlüt mache.

Unseri Schuehschachtle-Larve het Dildi-Larve vorbereitet. Ächt Schuehschachtle sinn beschichtet worde, damit si hart und fescht wärde. Au d Montaausch uf e Helm het denn dr Larvemacher gmacht. Mir hänn aber d Grundierig gstriche, s Gesicht gmoolt, d Naase uffkläbt und dr Deggel montiert. Am Schluss hämmer uss alte Plastikg-Segg d Hoor aagliimt.



Drlyr het s Requisit nit esoo vuyf Arbeit gää. Ganz easy hämmer immer Zyt khaa, zem unser "Bau-Znacht" z verdruggel!



Am Samschtig vor dr  
Faasnacht hämmer s erscht  
mol e „Faasnachts-  
Yschällete“ duuregfiert.  
E Hampfle Gönner, Fründe und  
d Luftschnapperli hänn unter  
dr Regie vom Mull zämme uf  
die drey scheenschte Dääg  
aagstoosse.

Höhepunkt vom Event sin sicher dr Bangg  
„Die Grobschlächtige“ gsii. E witzigs Duo, wo  
zwar e bitz Aalaufschwierigkeit kaa het,  
denn aber immer besser in Faart koo isch.  
Wo si denn dr „Schnitzel-Song“ ... Aber bitte  
nit d Schwoobe ...“ gsunge hänn, hänn alli  
begeischertered mitgsunge!



Ab de Drey wärs losgange, s het aber söttigi  
gää, die sinn scho e halb Stund vorhär dört gsii  
Nääme wämmer jetzt keini nenne ...

Rund 50 Persone hänn im Verlauf vom Oobe  
unsere Event bsuecht. Daylwyys isches scho e  
bitz äng gsii.





An dämm Nommidagg  
(4. Meerz) isch denn au  
dr grossi Schnee koo.  
Das het fyr die meischte  
e lange und  
beschweerligge  
Heiwääg bedüdet. Die  
letschte Höggeler hääns  
denn mit Humor gnoo.  
Hejo, wenn de vo Aesch  
nach Pfäffigge kasch  
uffe stampfe ....!



**Das mol hämmer dr Urs z Wort koo loo. Är isch dr Brueder vom Vreni und dr Götti vom Michèl (Dildi-Larve), dört wo mir immer unseri Larve mache löön.**

Name	Urs Werdenberg
Alter	bald 60
Zivilstand	verhyrootet mit dr Corinne
Kinder	2 Söön, Andreas und Martin
Bruef	Glernte Vermässer; hyte Larvemacher bi Dildi-Larve.



**Wie würd e Wärbeslogan iber di lute?**  
„Fascht immer fyr e Saich z haa“

**Was würdisch an dim Uusgsee ändere?**  
Nüt, no besser wär yybertriibe.

**3 positivi Aigeschafte vo dir?**  
Eerlig, graduss und spontan.

**Was sinn dini Hobbys?**  
Fussball, wildi Tier und mi Frau.

**Was hesch welle wärde, wo de ebbe 10 gi bisch?**  
Pilot vo dr Swissair.

**Mit was hesch als Kind am liebschte gspiilt?**  
Mit allem, wo e Balle drby gsii isch.

**Hesch e Laschter? Und welles?**  
Ich ka bi de Zurfluh-Buebe, Mull, Marco und im Biry René nit nai saage, wenn si frooge „Nimmsch no ain?“

**Was kritisiersch an dir sälber?**  
Das ich z grosszygig bi und immer nur an s Guete glaub.

**Was wär di Traum vom Abentüür?**  
In dr Kalahari die wildi Tier go beobachte

**Was issisch, dringsch am liebschte?**  
Hömlli, Ghagglts und e guet Wyy.

**Was loosisch gärn fir Musig?**  
Us de 60 Joore.

**Lääsisch grad e Buech, und um was goots?**  
Ich liis gärn Biographie, vo Lyt, wo mi interessiere.

**Du dörftisch e neys Gsetz kreiere – welles wär das?**  
Keins, ich hätt lieber weniger Gsetz.

**Iber was fir Glaynigkaite kasch di ergere?**  
Wenn mir d Frau am Morge das und das z Nacht verspricht und ich denn das Zoobe nit bekumm.

**In was wärsch gärn e Superstar?**  
Niene.

**Welli 3 Sache würdsch uff e ainsaami Insle mitnäã?**  
Kunnt fyr mi nit in Froog, well ich d Lyt zem Lääbe bruuch.

**Wenn dr Arzt würd saage, du hesch nur no 24 Stund z lääbe, was machsch?**  
Mit mim Schatz ain duure gää!

**E gueti Fee schänggt dir spontaan Fr. 25'000.- zum «verputze». Was machsch drmit?**  
Mit de beschte Fründe und Kolleege e Feschst styyge loo.

**Wo usser dr Schwyz, kennsch dr au no vorstelle z lääbe?**  
Niene anderscht!

**Liebi isch ...?**  
Wenn ich ain duure gää ha und mi den d Corinne am 4i am Morge frog: „Hesch no Durscht?“

**3 spontaani Gedangge zer Faasnacht?**  
Morgestraich, Ladärne und Larve vo de Luftschnapperli an dr Faasnacht 2006!

Liebi Gönner und Fründe.

Mir mechte euch härzlig  
yylaade! Am Samschtig,  
19. Auguscht isch Pick-Nick  
aagsait. Zem erschte mool  
organisiere mir dä Aaloss  
zämme mit de Heumattrueche!

**S gmainsaame OK vo de Luftschnapperli und  
de Heumattrueche laadet yy:**

**Pick-Nick 2006  
am Samschtig 19. Auguscht  
uf em Hächtliacker in Basel!**

**D Hächtliacker-Matte isch in dr Nööchi vom  
Rest. ¼ Kreis, bi dr Haltstell „Leimgruebewäg“.**

**Zyt: ab 11.00h**

**Mitnäa: ebbis z Ässe (am beschte ebbis  
uf e Grill) und Byylaage. Bitte au Däller  
und Bschtegg mitnäa.**

**Offeriert: Bier vom Fass, Kaffi und Kueche**

**Grill, Tisch und Bängg organiziere natyrlig mir!**

**Mir freye uns fescht! d Luftschnapperli &  
d Heumattrueche**

**Bi unsicherem Wätter kasch aalyte (ab 09.00h).  
Telifoon: 076 441 47 90 (Mull)**



## Termine

Pick-Nick mit de Gönner und Fründe:  
Samschtig, 19. August 2006, ab 11h.

Fasnacht 2007: 26. – 28. Februar

## E spezielle Dangg an

s **Vreni Deola** (s Memele vom Sändi)  
und an d **Müllers vom Birsquai** in  
Blätzbums, fir dr Batze an dr Faasnacht  
fir in d Clique-Kasse.

Au e liebe Dangg an s **Liselott  
Sommerhalder** (s Schwiegermami vom  
Kurt) fir d Zwüscheverpflägg am  
Wettstaipplatz.

## Scho mitbekoo?

Me glaubts kuum, aber es söll woor sii:  
die beide **Zurfluh-Zwilling** (Ruedi und  
Fix) sigge schyyns ano 19-hundert-  
öpfelbütschgi Basler-Meischter im  
Schwimme gsii. Und das in 4 x hundert  
Meter Laage!

S Mimösli hett „Thomas & Thomas“, mir  
hänn drfir „Urs & Urs“. Jetzt wüsse mir  
au, worum me sayt „Verzell das em  
Fäärimaa!“ S isch jo scho ungläubig,  
was unser Schueschachtel-Kinschtler, s  
**Dildi's Urs** em **Kuugele-Urs** (syt  
neyschtem au Lääbensretter gruefe) fir  
Züüg verzellt, nur damit sy „Bischüüli“  
deheim nit merggt, wäär wirgligg am  
Silweschter das feyne Kääsfondüü isch  
go boschte.

## Mir gratuliere

Zem 70igschte! S **Elfie Cunz** het am  
31.5.06 dä Rundi gfiert.

## E Faasnachtswitz

Ein Nackter springt in Basel in ein Taxi.  
"Ins Casino !! Schnäll !!  
Dört isch hüt e Masggeball und ich bi  
scho spoot draa!" "E Masggeball?",  
sagt der Taxifahrer verwundert, "Sie  
hänn jo gar kai Goschdym aal!" "Seschnid  
das Kirs?", meint darauf der Nackte  
und deutet auf eine Kirsche zwischen  
seinen Zähnen, "Das isch mi  
Goschdym. Ich gang nämli als <Mon  
Cherii>! Und jetz faare Sie ändlig!"  
"Minetwäge" brummt der Taxifahrer und  
fährt los. Er braust durch die St.Alban-  
Vorstadt dahin, bis er plötzlich eine  
Notbremsung machen muss. Den  
Nackten hinten schmeisst es nach vorn,  
dann nach hinten, und -GLUPS- hat er  
die Kirsche verschluckt. "Sinn Sie  
wahnsinnig?!" herrscht er den Fahrer  
an. "Was faare Sie zämme! Ich ha s  
Kirsi verschluggt. Jetz ha ich kai  
Goschdym me. Was mach ich jetz,  
was mach ich jetz? Ha! Sie göön jetz  
sofort in das Gschäft dört ääne und  
bsorge mir e neys Kirs!" Maulend steigt  
der Taxifahrer aus und verschwindet im  
Laden. Und kommt ewig nicht heraus.  
Endlich kommt er zurück, wirft dem  
Nackten ein Konfitüreglas nach  
hinten und fährt weiter. Der Nackte:  
"Was isch in däm Glas?" Der  
Taxifahrer: "Himbeerigomfi!" "Ich  
bruch aber e Kirs!" "Hänn sy kaini  
kaa!" "Und was söll ich mit dr Gomfi?"  
"Schmir dir's aifach in Arsch und gang  
als Berliner!"

Gäll, du kennsch  
mi scho?



ÖKK

Öffentliche Krankenkassen  
Schweiz

Jung und unkompliziert.